

Corte di Husticia ta dicta na fabor di Comite Olimpico Arubano

(Rechazando argumentonan di dirigenten anterior)

ORANJESTAD (AAN): Dia 16 juni 1998 Corte di Husticia a dicta sentencia den e apelacion cu tres dirigente anterior di Comite Olimpico Arubano a entama contra decision di Huez den Prome Instancia pa aproba nan destitucion for di dicho organizacion.

Nos ta cita veredicto di Corte di Husticia:

Centrale Accountantsdienst(CAD) a publica rapport di su investigacion den funcionamiento di e administracion financiero di COA y a conclui cu fayonan grandi y serio a wordo cometi durante aña 1996, Centrale Accountantsdienst(mescos cu directiva actual di COA a hasi caba) a hasi denuncia na Ministerio Publico di irregu-

laridadnan cu a wordo cometi pa directiva anterior.

Conclusion di e investigacion di CAD no ta wordo desmenti pa Leysner, de Cuba y Leslie, pues Corte di Husticia ta asumi cu e rapport ta duna un bista correcto y veredicto di loke tabata pasa den COA.

Corte di Husticia ta constata cu Leysner/de Cuba/Leslie a

ocasiona un caos administrativo y financiero durante nan periodo di dirigencia.

Corte ta di opinion cu ta di interes general pa pone ordo den COA riba termino corto y na un manera decisivo.

Leysner/De Cuba/Leslie no ta e personanan indica pa cumpli cu e tarea aki.

Nan a ocasiona e caos y a demostra, en todo caso durante nan periodo di dirigencia, di no por a drecha e situacion.

Pa e motibo aki nan a worde re-instala den nan funcion anterior den directiva di Comite Olimpico Arubano.

Mirando e forma cu nan a ehecuta nan tarea, Corte ta di opinion cu nan interes esta pa drecha nan nomber-no ta mes importante cu interes di COA pa hiba un maneho responsa-

bel, transparente y controlable pa loke ta trata e fondonan publico cu ta wordo poni na disposicion di COA, ta pisa mas den e caso aki.

Pa e motibo aki Corte ta rechasa tur e exigencianan di Leysner/De Cuba/Leslie.

Leysner/De Cuba/Leslie, como partido perdedor ta wordo condena pa paga e gastonan di e apelacion aki.

Directiva di Comite Olimpico Arubano ta considera e veredicto aki clausura di un epoca bastante scur den su historia.

Conforme decision di huez, pero primeramente a base di un propio conviccion, lo continua cu trabao pa hasi di Comite Olimpico Arubano e organizacion fuerte cu e mester y merece di ta.

Bubali Sport Club ta mantene su invicto derotando S.L.D.



ORANJESTAD (AAN): Na continuacion di e campeonato futbol Division Prome, e orgullonan di Noord, Bubali Sport Club diasabra atardi den Compleho Deportivo Guillermo P. Trinidad a logra un victoria riba San Luis De-

portivo(Subway) cu score 2-1.

San Luis Deportivo den prome tempo a haya varios bon oportunidad clave pa habri e score, pero Carlos Rubio a tira halto, despues otro chens cu nan a bolbe faya.

Bubali Sport Club casi

promete cu sosiego Daniel Escalona ta pone su equipo den ventaha 1-0.

E segundo periodo San Luis Deportivo ta iguala e score 1-1, pero Robby Tromp ta score e gol cu a resulta esun di victoria 2-1.

Aruba a logra 9 medaya di oro den First Dutch Caribbean Championship na Korsow

ORANJESTAD (AAN): E siguiente 3 Clubnan di Atletismo =(CAMO, Sun Rise y Olympia) a participa e weekend di 19 - 20 juni na e "First Dutch Caribbean Championship in Track & Field na Korsow, na unda atletanan di Korsow, St. Maarten, Anguilla y Aruba a midi forsanan.

E diferente categorianan(Masculino y Femenino) ta: 14 - 16 aña, 17 - 19 aña, y 20 aña plus.

E atletanan di Aruba a sa di conquista 9 medaya di oro, 5 di plata, 5 di brons.

E atleta cu a obtene mas medaya ta Richard Luydens di Olympia, cu 2 di plata y 2 di brons.

Ricky Nelson di CAMO a obtene 2 medaya di oro den bulamento Halto y Leu, Angelina Lopez di Sun Rise a obtene 2 medaya di Oro den kogelstoten y 200 meter damas 14 - 16 aña.

Luzmarina German di Olympia a logra 1 medaya di Oro den 100 meter Damas 14 - 16 aña.

Gilbert Kelly di Olympia, un hoben di 12 aña a impresionar den Bulamento Leu cu medaya di Plata cu un dis-

tancia di 5,36 meter.

Jonathan Croes di CAMO a logra medaya di Brons den Kogelstoten 14 - 16 aña.

Jay Lovell di Sun Rise Track Club a logra medaya di Brons den 800 meter 14 - 16 aña.

Alex Wester-Diaz di Olympia a logra medaya di Plata den Kogelstoten y Speerwerpen.

Nail Alexander di Sun Rise a logra medaya den Bulamento Halto cu un haltura di 1.73 meter 14 - 16.

Kimberly Maduro di Olympia 13 aña a logra medaya di Plata den 800 meter Damas. 14 - 16 aña den un bunita tempo 2 minuut 43 sec.

Kenneth Lucas di Sun Rise a logra den Veteranos medaya di oro den jabalina.

Angelo Roga di CAMO a logra 2 medaya di oro den 100 meter y 200 meter 14 - 16 aña.

E atletanan a keda masha contento cu e trato ricibi na Korsow, na unda muy posible otro islanan den Caribe tambe lo ta presente.

Un pabien grandi di Diario Deportivo na tur e atletanan cu a logra gana medaya, pero tambe na esunnan cu a participa.